



**СЛУЖБА**  
**святому блаженному старцу**  
**Даниилу Елисаветградскому,**  
**Христа ради юродивому, чудотворцу**

## НА ВЕЛИЦЕЙ ВЕЧЕРНИ

### На Господи, воззвах: стихиры на 6, глас 1:

Днесь Елисаветград ликует в памяти твоей, / премудре Данииле отче наш, / ты бо скверну отвергл еси плоти и духа, / мира смертоносных избегл сластей, / равноангельное же житие поживше, / в Вышнее прешел еси жилище, / отнюду же не престай за ны молитися, // любовию тя, отче, славящих.

Яко врача тя всеизрядна и молитвенника благоприятна, / наставника благочестия и чудотворца славнаго, / к тебе притекающе, / Данииле Богомудре блаженне, / радующесея, Христа прославляем, // таковую тебе благодать даровавшего исцелений.

О творящих твою память верно, / всеблаженне Данииле всечестне, / и многия подвиги боголепнаго твоего жития поющих, / молися непрестанно сохранить от бед и скорбей // и будущия муки, отче, избавити.

### Ины стихиры, глас 6:

Глас Христовых словес в сердце своем приемь, / нищету духовную восприял еси, / безумие мира юродством обличил еси, / смирением низложил еси коварства и хитрости лукаваго, / нам же явился еси молитвенник теплейший, // присно ходатайствующий о душах наших.

Теплою молитвою вражия искушения победив, / постом и страстей обузданием Господеви благоугодил еси: / темже чудес приял еси дар, всем исцеления подавая, / верою притекающим к заступлению твоему, Данииле богомудре, / моли Христа Бога грехов оставление даровати // чтущим любовию святую память твою.

Богу от младенства возложен быв / и Тому даже до конца благоугождая, / отче наш Данииле, / дарование зрения душ человеческих восприял еси / и демонов множество отгнал еси благодатию. / Сего ради вопием ти, досточудне: / моли Христа Бога грехов оставление подати // чтущим любовию святую память твою.

**Ч**уждъ пребыл еси славы человеческия, / возлюбив едину славу Царя Христа, / Егоже ради подвиги всеразличныя подъял еси, / юродством мнимым безумие мира обличая, / верных же ко спасению руководствуя, / велию благодать стяжал еси от Бога, Данииле славне, // ею же и нас посети, отче всеблаженне.

**Слава, глас тойже:**

**Н**а скрижалех сердца твоего / имея написанныя заповеди Божия, / подражал еси древним отцем: / славу и мудрость мирскую отвергнув, / чужд же был еси тщеславной гордыни. / Сего ради ныне молим тя, отче Данииле: // молися присно о спасении всех нас.

**И ныне, глас тойже: Кто Тебе не ублажит:**

**Вход. Прокимен дне, и чтения 3.**

**Премудрости Соломоновы чтение (глава 3):**

**П**раведных души в руце Божией, и не прикоснется их мука. Непщевани быша во очесех безумных умрети, и вменися озлобление исход их. И еже от нас шествие сокрушение, они же суть в мире. Ибо пред лицом человеческим аще и муку примут, упование их безсмертия исполнено. И в мале наказания бывше, великими благодетельствовани будут, яко Бог искуси я и обрете их достойны Себе. Яко злато в горниле, искуси их и, яко всеплодие жертвенное, прият я. И во время посещения их возсияют и, яко искры по стеблюю потекут. Судят языком и обладают людьми, и воцарится Господь в них во веки. Надеющиися Нань разумеют истину и вернии в любви пребудут Ему, яко благодать и милость в преподобных Его и посещение во избранных Его.

**Премудрости Соломоновы чтение (глава 4):**

**П**раведник, аще постигнет скончаться, в покои будет. Старость бо честна не многолетна, ниже в числе лет исчитается. Седина же есть мудрость человеком, и возраст старости, житие нескверное.

Благоугоден Богови быв, возлюблен бысть, и живой посреде грешник, преставлен бысть. Восхищен бысть, да не злоба изменит разума его, или лесьть прельстит душу его. Рачение злобы помрачает добрая, и парение похоти пременяет ум незлобив. Скончався в мале, исполни лета долга. Угодна бо бе Господеви душа его. Сего ради потщася от среды лукавствия. Людие же видевшие и не разумевше, ниже положше в помышлении таковое: яко благодать и милость в преподобных Его, и посещение во избранных Его.

### **Премудрости Соломоновы чтение (глава 5 и 6):**

**П**раведницы во веки живут, и в Господе мзда их, и попечение их у Вышняго. Сего ради примут Царствие благолепия и венец доброты от руки Господни, зане десницею покрывает я и мышцею защитит их. Примет всеоружие рвение свое и вооружит тварь в месть врагом. Облечется в броня правды и возложит шлем суд нелицемерен. Примет щит непобедимый преподобие, поострит же напрасный гнев во оружие, споборет же с ним мир на безумных. Пойдут праволучныя стрелы молниины и, яко от благокругла лука облаков, на намерение полетят. И от каменометныя ярости исполнь падут грады, вознегодует на них вода морская, реки же потопят я нагло. Сопротив станет им дух силы и, яко вихор, развеет их, и опустошит всю землю беззаконие, и злодейство превратит престолы сильных. Слышите убо, царие, и разумеите, навикните, судии концев земли, внушите, держащие множества и гордящиися о народех язык, яко дана есть от Господа держава вам и сила от Вышняго.

### **На литии стихира святаго, глас 4:**

**О**браз благочестия явился, / богатая дарования духовная обрел еси у Христа, / Иже и прослави тя, Данииле, славою неувядаемою, / и даром исцелений и чудес обогати, // Емуже молися о спасении душ наших.

**Слава, глас 6:**

**Г**лас Христовых словес в сердце своем приемь, / нищету духовную восприял еси, / безумие мира юродством обличил еси, / смирением низложил еси коварства и хитрости лукаваго, / нам же явился еси молитвенник и отец теплейший, // выну ходатайствующий о душах наших.

**И ныне, Богородичен:**

**Е**диносущное Слово Отчее, бытие всей твари подающее, содела Тя, Богоблаженная, чистую Свою Матерь, Живот миру источившую.

**На стиховне стихиры, глас 2:**

**Подобен: ДOME Евфрафов:**

**Д**ом и жилище / Духу Пресвятому, / Данииле отче, был еси, / темже и нас дома Тому содей, // иже святую твою память почитающих.

**Стих: Ч**естна пред Господем / смерть преподобных Его.

**П**одвиг твой, яко солнце, / Елисаветград просвети, священне, / темже и нас Боговедения светом / озари, блаженне, // всечестную твою память празднующих.

**Стих: Б**лажен муж, бояйся Господа, / в заповедех Его восхощет зело.

**Н**е престаи моляся, / отче Данииле, / о присных твоих чадах, / ихже житием евангельским просветил еси, // да вси честное твое празднество почитаем.

**Слава, глас и подобен тойже:**

**Ч**еловече Божий / и верный Господень слуга, / сосуде благодати избранный, / столпе и утверждение земли Елисаветградския, / не премолчи, вопия за нас ко Господу.

**И ныне, Богородичен, глас и подобен тойже:**

**П**ресвятая Мати Божия, / с лики святых / молися из Тебе Воплощенному, / Солнцу Правды, Господу, / спасти и просветити души наша.

**Тропарь святого, глас 4:**

**Е**лисаветградския земли украшение, / людем православным похвало и утверждение, / кротости и добродетелей всечестное правило, / Данииле отче всеблаженне, // моли Христа Бога, спастися душам нашим.

**НА УТРЕНИ**

**По 1-м стихословии седален, глас 2:**

**Н**а земли живя, земная мудрствовати презирал еси, / но, слушая словеса спасительныя, / весь ум твой устремил еси в Горняя, // сего ради и сам ныне, Данииле, в Горних водворяешься.

**Слава, и ныне, Богородичен, глас тойже:**

**Н**едоумет всяк язык / достойными Тя ублажити похвалами, Всесвятая Владычице, / из Твоих бо ложесн пройде Спас и Избавитель мира.

**По 2-м стихословии седален, глас 5:**

**С**тратныя тьмы отбег, / к безетрастию путем наставляемь, / к Свету невечернему востекл еси, Данииле блаженне, / и, от Сего озарився, / нетления богатство наследовал еси. // Моли непрестанно о всех нас.

**Слава, и ныне, Богородичен, глас тойже:**

**Д**уши моей леньность лютую / и сердца моего неможение, / Мати Божия Пречистая, / возревши, исцели молитвами Твоими / и спасеных части сподоби, / избавляющи мя тьмы и мучения, // яко Едина упование мое и утешение.

**По полиелее седален, глас 8:**

**П**риидите, вси вернии, / псалмы и песньми священное и честное / блаженнаго Даниила торжество днесь благочестно восхвалим, / аще бо и последи возсия, / но древних чести сподобися, // и молится Христови спастися душам нашим.

### **Слава, и ныне, Богородичен:**

**Богородице** Дево, / Вседержавная наша Царице, / омофором молитв Твоих покрывающая весь мир, / прими от благодарных сердец наших / похвальные песни сия / и испроси нам у Сына Твоего Богоначального // грехов прощение и велию милость.

**Таже степенна, 1-й антифон, глас 4. Прокимен, глас 4:** Честна пред Господом смерть преподобных Его. **Стих:** Что воздам Господеву о всех, яже воздаде ми? **Всякое дыхание: Евангелие от Матфея, зачало 43.**

### **По 50-м псалме стихира самогласна, глас 6:**

**Данииле** отче священный, / возненавидев временная мира сего, / умертвил еси вся плотския страсти, / богоугодно подвизался еси, / на высоту востекл еси добродетелей, / дарований Святаго Духа сподобився, / показался еси безумен миру, но Христу мудр: / подвизался еси Царства ради Небеснаго, / егоже и достигл еси. / И ныне со Ангелы ликовствуя, // моли спастися душам нашим.

### **Канон святому, глас 2.**

#### **Песнь 1**

**Ирмос:** *Грядите, людие, / поим песнь Христу Богу, / раздельшему море, / и наставльшему люди, яже изведе из работы египетския, / яко прославися.*

**Припев:** Блаженне отче Данииле, моли Бога о нас.

**Умом** очищенным преславно зриши, Данииле блаженне, доброту неизреченную – Христа Бога нашего, Егоже моли достойно воспети подвиги твоя.

**Якоже** Илия на колеснице, отче Данииле, добродетельми твоими возшел еси на Небо и тамо чисте зриши Святую Троицу, к Ней же молитву о нас возносиши, блаженне.

**Вседержителю** Престолу предстоиши, мудре, яко изрядный воин, подобяся своему Владыце, Емуже от юности вожделел еси, и

бысть Ангелом собеседник и праведным сопричастник, Данииле всеблаженне.

**Богородичен:** Светлыми лучами Твоего Сына, Богородице, просвети омраченную мою душу, страстей смущение отжени, Твоими, Чистая, ходатайствы.

### **Песнь 3**

**Ирмос:** *На камени мя веры утвердив, / расширил еси уста моя на враги моя. / Возвесели бо ся дух мой, внемда пети: / несть свят, якоже Бог наш, / и несть праведен паче Тебе, Господи.*

**Благими** нравы украсився, Христу прилепился еси от юности, плотския страсти умертвив воздержанием, и к Жизни нестареющей, блаженне, преставился еси.

**Крепостию** Христа возмог, державу же и силу вражию низложил еси и похвалу победных почести, блаженне Данииле, чудесными сиянии улучил еси.

**Совесть** имел еси благу, око сердечное, взирающее к Богу, темже внят молитве твоей, премудре отче, и со святыми сочета тя, Богоблаженне.

**Богородичен:** Прогоняющее оружие грехи и страсти души моя буди, Дево, и покажи мя, якоже другой рай, безнаветен и соблюден Тобою и приносящий цветы Духа.

### **Седален, глас 3:**

**Словесы** евангельскими озаряемь, / в пути, ведущим к жизни, Божественным сиянием ходив верно, / вражеских избежав прилогов, / сын света и дне явился еси, // Данииле Богоблаженне.

### **Слава, и ныне, Богородичен:**

**Пречистыя** Твои руке, Дево Мати, простерши, / покрый уповающия на Тя и к Сыну Твоему зовущия: // всем подаждь, Христе, Твоя милости.

#### **Песнь 4**

**Ирмос:** *Пришел еси от Девы, / не ходатай, ни Ангел, / но Сам, Господи, воплощся, / и спасл еси всего мя человека. / Тем зову Ти: / слава силе Твоей, Господи.*

Днесь Елисаветградская земля веселия исполняется, память блаженного Даниила совершающе и непрестанно Христу воспевающе: слава силе Твоей, Господи.

**Я**ко звезда пресветлая, сияющи на Небосводе Церковнем, Данииле всеблаженне, осияй нас чад твоих, всечестную твою память празднующих.

**В**ысотой смирения украшаем, отче Данииле славне, свергл еси на землю велехвальнаго горделивца плоти своей Божественными веленьми и добрыми делы твоими.

**Богородичен:** **В**озсия из утробы Твоея, Отроковице Неискусобрачная, Отчее сияние – Христос, и просвети вселенную, распинаемь, и бесовскую тьму потребил есть.

#### **Песнь 5**

**Ирмос:** *Света подателю и веков Творче, Господи, / во свете Твоих повелений настави нас; / разве бо Тебе иного бога не знаем.*

Душу твою храм Святому Духу содеяв, преславне Данииле, был еси наследник Горняго Царствия, с Вышними чинами водворяясь, всечестне отче.

**М**ногоболезненные страсти всегда врачуеши приступающих к тебе тепле и расслабленной девице даруеши хождение: благодать бо, всечестне, имаши от Господа содевати знамения и чудеса, пребогате.

**Н**а Небесех с праведными веселишися, преблаженне Данииле, с нимиже Христови предстоя, моли мир мирови даровати, и всем христианом здравие и скорбящим утешение.

**Богородичен:** **З**акона исполнение, высшая Херувим, родила еси Божия Слова воплощена, Сына Единородна, Егоже о рабех Твоих умоли.

## Песнь 6

**Ирмос:** *В бездне греховней валяясь, / неизследную милосердия Твоего / призываю бездну: / от тли, Боже, мя возведи.*

**З**мий лукавый умертвися священными подвиги твоими, всеблаженне Данииле, темже и молящимся тебе вспомошествуеши разрешитися от его злобы, блаженне.

**О**т юности по узкому пути ходил еси Божественными восхождении, отче Данииле всечестне, пространнаго же пути удаляясь и невидимаго змия смирил еси, юродством евангельским оградившеся.

**Т**рудолюбне, в поте лица твоего возделывал землю, скудную пищею питаюсь от трудов твоих, нам же добрый и милостивый кормитель буди еси, старче Богоблаженне.

**Богородичен:** **М**илости Твоя, Богородице, сподоби мя, премилостиваго Слова рождающая, своею кровию от тли человеки избавльшаго.

## Кондак, глас 3:

**Б**огоизбранная звезда явился еси, блаженне Данииле, / светом Божественным путеводяй странствующих во тьме жития сего, / Елисаветград молитвами и бдении твоими освятил еси, / темже чтущим святую память твою, / моли Человеколюбца Бога, / от бед и нападений избавитися // и спаситися душам нашим, святе, молитвами твоими.

## Икос:

**Ю**родством премудрости достиг еси глубину, преблаженне Данииле, / и райская селения наследив, / и ныне веселяся с лики праведных, / и чести зря Владычния доброты, / и со Ангелы предстоя Человеколюбцу Богу, / моли от бед и падений избавитися // и спаситися душам нашим, святе, молитвами твоими

## Песнь 7

**Ирмос:** *Да преславное рождество Твое, Христе, / еже от Девы прообразиши яве, / неопалимы в печи отроки сохранил еси, / песньми поющья Тебе: / отцев, Боже, благословен еси.*

**П**овеления отеческая храня невредимо, правоверным смыслом, ты от юности имел еси житие чисто и милостивен нрав, Данииле досточудне.

**Н**ичтоже изволив любить на земли паче Зиждителя: средь мира тленного скитался еси, Богу нетленному умом предстоя, радовался еси, блаженне, поя Вседержителю: препетый отцев, Боже, благословен еси.

**С**редь сада земнаго возделал еси душу свою в добродетелех, ныне же в вышнем Царствии венценосец живеши, просвещения сподобився и красоты празднующих, Данииле отче блаженне.

**Богородичен:** Радуйся, Владычице Дево, всем людям похвала, непрестанно молися Христу Богу сохранить град сей и люди молитвами всеблаженного Даниила.

## Песнь 8

**Ирмос:** *В пещь огненную ко отроком еврейским снишедшаго, и пламень в росу преложшаго Бога, пойте дела яко Господа, и превозносите во вся веки.*

**К**апли сладкия искапавше, блаженне, молитвенных трудов твоих сладость и благодатных исцелений сияния, молитва же твоя источник воды откры на хвалу Христа Бога нашего.

**В**о дворех Бога процвел еси, виноград многоплоден прозяб, и добродетелей гроздие, яко плод сторичен, Делателю Божественному обильне подал еси.

**П**лотию обложен, отче Данииле, смирил еси надменную выю нечистиваго благими к Богу воздыханьми, непорочне.

**Богородичен:** Христа нам родила еси, Пречистая Богородованная Дево, спаси люди, иже на Тя уповающия, Богородице Пренепорочная.

## Песнь 9

**Ирмос:** *Безначальна Родителя Сын, Бог и Господь, воплощся от Девы нам явися, омраченная просветити, собрати расточенная: тем всепетую Богородицу величаем.*

**С**ам неблагороден сотворився, благородны нравы стяжал еси умом целым, поучением же упражнялся Богодохновенных писаний, все желание твое к Богу Всевидцу, Данииле блаженне, возложил еси.

**В**идети желая славу Бога нашего, добродетельми богоразумия себе удобрил еси и, свещу нося, вшел еси во светлый чертог, со Ангелы живой ясне наслаждаяся Божества.

**В**сельшеюся в тя благодатию Святаго Духа, отче Данииле, благоустрояеши души притекающих к тебе: лукавно бо страстьми в человецех действующии нечистии дуси отгоняеми бывают

**Богородичен:** Творение всякое, радуйся, Владычице, Тебе от души приносит, Единого Бога и всех Царя родившей, радости вечныя Подателя.

### Светилен, глас 2:

**Я**ко утреннее солнце, взыде память твоя, сущия во мраце сердца просвещаючи: ты бо света и дне явился еси воистинну сын, Богомудре Данииле. Сего ради тя почитаем.

### Слава, и ныне, Богородичен:

**С**лавословие Тебе приносим, Мати Дево, явившей миру Свет Присносияющий, тьму неверия и греха расточающий, и присною радостью души наша исполняющий.

### На хвалитех стихиры святаго, глас 2:

**Я**коже птица благопесенная, / посреде садовней красоты воспевал еси Богу хваления / и златы отгуду приял еси криле / безстрастия и совершения, / и к Небесней высоте вселился еси, отче Данииле, // о нас всегда моляся, прославляющих тя.

**М**удростию украшаяся и разумом просвещаяся, / смирением сердца красуюся, / высотой жития, досточудне, / в разумныя дворы вшел еси, // идеже нас помяни, чтущих тя, блаженне Данииле.

**Ц**еломудрием и благоверием, / яко багряницею многоценною, одеаяся, Данииле, / правдою же и кротостию, / яко Божественным венцем, увязлся еси, / со страждущими Христа ради царствовать возжелел еси. / И ныне Царю сил предстоиши, // Всемилоствому Богу и Спасу душ наших.

**Я**ко финикс, Давидски процвел еси, блаженне, / и, крестное оружие восприим, Данииле премудре, / бездны страстей изсушил еси воздержанием, / чистотою же возвысився, / сосуд явился еси Пресвятаго Духа. / Христа непрестанно моли о граде твоём и живущих в нем, // верою и любовью празднующих всечестную память твою.

### **Слава, глас 8:**

**К**о Господу желанием, преблаженне Данииле, наставляем, / в буйство претворися Христа ради, / богоугодно житие совершил еси, отче, / моли Христа Бога / даровати празднующим память твою // оставление грехов и велию милость.

### **И ныне, глас тойже:**

**В**ладычице, приими молитвы раб Твоих / и избави нас от всякия нужды и печали, / Ты еси, Богородице, оружие наше и стена, / Ты еси Заступница, и к Тебе прибегаем, / Тя и ныне на молитву призываем, / да избавиши нас от врагов наших. / Возвеличим Тя вси, / Всенепорочную Матерь Христа Бога, // Юже осени Дух Пресвятый.

### **Славословие великое и отпуст.**

#### **НА ЛИТУРГИИ**

**Блаженны от канона песнь 3-я и 6-я. Прокимен, глас 7:** Честна пред Господем / смерть преподобных Его. **Стих:** Что воздам Господеву о всех, яже воздаде ми? **Апостол к Галатам, зачало 213. Аллилуиа, глас 4:** Праведник, яко финикс, процветет,

/ яко кедр, иже в Ливане, умножится. **Стих:** Насажденнии в дому Господни во дворех Бога нашего процветут. **Евангелие от Луки, зачало 24. Причастен:** В память вечную будет праведник:

### **МОЛИТВА**

**О**, досточудне и всеблаженне отче наш Данииле, землю Елисаветградскую житием и подвиги своими освятивый и чудесы твоими людем православным помощь донине обильно подающий. Прославляюще прославльшаго тя Господа, во святых Своих дивнаго, славословие тебе приносим и усердно молим тя: отче блаженне, молитвами твоими яже к Богу сохрани Град наш и Отчество от всякия беды и напасти, огради ходатайством твоим Церковь нашу Святую и умири всякое нестроение и соблазн, от врага всеваемый, даруй нам дух ревности и терпения, дух разума и любви, обнови страх Божий в сердцах наших и возгрей их пламенем непрестанныя молитвы. Ей, Данииле Богомудре, сохрани всех нас от соблазнов и грехопадений, от злобы и неправды, от искушений и страстей и вся люди православныя во исповедании отеческия веры укрепи, да купно с тобою и со всеми святыми прославим Всеблагаго Бога, Отца и Сына и Святаго Духа во веки веков. **А**минь.